

— E S O R D I O —

(1) Sotgiu

Sos'annos mios coment'a agn'unu  
passan mancar'in giru canta canta.  
como non isco cantas bortas sonu  
ch'inoghe hapo cantadu a custa santa,  
solu t'hapo lassadu in su settanta  
pro t'agattare in su settant'unu.  
A s'annu in puntu, in su matessi trettu  
ti torro a saludare cun affettu.

(2) Piras

Sena cantare de front'a Bultei  
sun trese o battor'annos est cumprida,  
già chi m'han bidu agabende sa vida  
forsì hana nadu lassamulu e sei,  
però, cust'annu santa margarida  
pare chi m'hapat nadu torrabei.  
Ringraziende a bois e a Deu  
aggradesside su saludu meu.

(3) Piredda A.

Dogn'annu m'azis nadu, beni e canta  
pro sa Santa eroina e Santu eroe.  
su sessant'otto e su sessantanoe  
hapo cantadu in onore e sa santa,  
pro Pedru so ennidi in su settanta,  
pro Margherita so torradu oe.  
Pro nde attire a sos ch'inoghe sonu  
unu saludu in s'annu settant'unu.

## PRIMO TEMA

ARTE

NATURA

SCIENZE

*fatto il sorteggio è risultato:*

SOTGIU

ARTE

PIRAS

NATURA

PIREDDA A.

SCIENZA

### (1) Sotgiu

De su cappotto cun caldu e cun frittu  
hamos fattu in s'esordio baccanu,  
ma poi hat fattu su sou tragittu  
comente si costuma fittianu,  
e su berretto hap'ettadu sa manu  
pro nde tirare unu bigliette iscrittu.  
Ue signada fi sa mia parte  
a mie tocca de cantare s'arte.

### (2) Piras

Chere narrer chi tue cantas s'arte  
e la cantas cun coidu e cun cura,  
a mie puru nd'han dadu una parte  
ca nde tenzo dirittu addirittura;  
mancare in garas non sia unu Marte  
e non prevedo una bella figura.  
Instant'a mie sa sorte collocada  
in tema sa natura già mi toccada.

(3) Piredda A.

Lassade su cappotto abba e bentu  
ca già pare su entu asseliadu,  
da ch'hamos reposadu unu mamentu  
unu bigliette in manos no s'han dadu.  
Sunu tres parte ch'hana segnaladu  
ogn'unu e parte sua hat s'argumentu.  
A mie a custu populu a presenzia  
m'est toccadu a cantare s'iscenzia.

## SECONDO TEMA

TINTA

ORO

FERRO

*fatto il sorteggio è risultato:*

SOTGIU

PIRAS

PIREDDA A.

*TINTA*

*ORO*

*FERRO*

### (1) Sotgiu

Assumancu 'e energia un'ispinta  
no s'had'a dare s'estru ei sa vena,  
ei sa zente ch'iscultad'est cunvinta  
chi b'hamus arrivare francu pena,  
pro custu tema e sa seconda iscena  
a mie in parte est toccada sa tinta.  
Issara haia de tingher ispera  
como l'impito 'e attera manera

### (2) Piras

Como già damos atteruna ispinta  
pro allegrare a sa zente su coro  
deo pro prima cosa non ignoro  
s'est chi s'entusiasmu esti insistinta  
a Peppe Sotgiu l'han dadu sa tinta  
invece a mie m'est toccadu s'oro.  
Dae sa tinta non mi lasso astringhet  
ca s'oro già brillat e già tinghet

(3) Piredda A.

Bultei bido calma e riunida  
ch'hasa pro iscultare sa tendenzia  
est tramontada sa prima partida  
de tres temas chi fini a competenzia  
e deo fia cantende s'iscenzia  
già l'hazis bida comente est finida.  
Como lasso s'iscenzia in cuerru  
ca m'est toccadu a cantare su ferru.